



**Sogn og Fjordane  
fylkeskommune**



**Hordaland  
fylkeskommune**

**Kommunal- og moderniserings-  
departementet  
Postboks 8112 Dep.  
0032 OSLO**

**Dato: 15.12.2016**

## **Utsett frist for tilbagemelding i høve regionreforma**

Fylkeskommunane vart i brevet frå kommunal- og moderniseringsministeren av 02.07.15 oppmoda om å starte «nabopraten» med sikte på å gjere vedtak om eventuelle strukturendringar innanfor det regionale folkevalde nivået hausten 2016.

Ved Stortinget si handsaming av Meld. St. 22 (2015-16) «Nye folkevalde regionar» var det eit klårt fleirtal for at dagens 19 fylkeskommunar bør reduserast til om lag 10 nye folkevalde regionar.

I brev av 22.08.16 bad statsråden fylkeskommunane og Oslo kommune om å tydeleggjere kva for regionstruktur ein ønskjer. Det vart i brevet synt til at utgreiingar, argument og regionale vedtak vil utgjere det sentrale grunnlaget for regjeringa sitt framlegg til Stortinget om nye regionar vårsesjonen 2017. I brevet framheva statsråden at ei vidareføring av noverande fylkesstruktur ikkje er eit alternativt resultat av regionreforma.

Sogn og Fjordane, Hordaland og Rogaland fylkeskommunar har frå våren 2016 greidd ut, og forhandla om, grunnlaget for ein ny folkevald region på Vestlandet. Forhandlingane resulterte i ein intensjonsplan som no i desember er handsama i dei tre fylkestinga. Medan fylkestinga i Sogn og Fjordane (07.12.16) og Hordaland (14.12.16) gjorde positive vedtak, var det i Rogaland (13.12.16) ikkje fleirtal for å gå vidare inn i regionreforma med intensjonsplanen som plattform.

Fylkesordførarane i Sogn og Fjordane og Hordaland meiner at dersom ei nasjonal regionreform vert gjennomført i tråd med føresetnaden om at tal folkevalde regionar skal vere om lag 10, bør fylkeskommunane sjølv få ei reell moglegheit til å gjennomføre forhandlingar for å finne tenlege løysingar for det framtidige mellomnivået i forvaltninga.

Fylkesordførarane viser til at fylkestinget i Rogaland vedtok å stå utanfor Vestlandsregionen som eit nytt regionalt folkevald nivå på Vestlandet. Vi vil med grunnlag i vedlagde fylkestingsvedtak i Hordaland og Sogn og Fjordane gjennomføre reforhandlingar for ei ny regional løysing på Vestlandet med samanslåing av dei to fylka.

Vi sender difor denne førespurnaden til kommunal- og moderniseringsministeren, og ber om aksept for at vi kan nytte tida fram til 3. februar 2017 for å gjennomføre nødvendige lokale prosessar.

Vi vil trenge denne tida for å kunne få på plass ein ev. intensjonsplan som berre dekkjer våre to fylke. Vi torer be om snarleg tilbakemelding.

Med helsing

Jenny Følling  
Fylkesordførar  
Sogn og Fjordane  
(sign.)

Anne Gine Hestetun  
Fylkesordførar  
Hordaland  
(sign.)

*Brevet er elektronisk godkjent og er utan underskrift.*

Mottakar(ar):

1. Kommunal- og moderniseringsdepartementet ved statsråd Jan Tore Sanner

Vedlegg:

1. Fylkestingsvedtak 07.12.2016 - Sogn og Fjordane fylkeskommune
2. Fylkestingsvedtak 14.12.2016 - Hordaland fylkeskommune

## VEDLEGG 1

### **Fylkestinget i Sogn og Fjordane gjorde 07.12.16 slikt vedtak i FT-sak 52/16:**

1. Fylkestinget i Sogn og Fjordane er positiv til at det vert etablert ein sterk og attraktiv folkevald vestlandsregion med høg kvalitet i tenestene til innbyggjarane og ei framtidsretta samfunnsutvikling.
2. Fylkestinget legg til grunn at eit fleirtal i Stortinget i handsaminga av Meld. St. 22 (2015-16) tidlegare i år har sagt at tal folkevalde regionar skal reduserast vesentleg. Fylkestinget vil at Sogn og Fjordane vert ein del av ein større region, og syner i denne samanheng til intensjonsplanen av 15.09.2016 og den gjennomførte høyringsprosessen. Fylkestinget syner særleg til dei innkomne uttalane frå kommunane.

Fylkestinget vil, med grunnlag i inndelingslova, søkje statleg styresmakt om samanslåing med grunnlag i intensjonsplanen. Det er ein føresetnad at Hordaland og Rogaland fylkeskommunar søkjer tilsvarande.

Fylkestinget vil nemne opp sine representantar til fellesnemnda i april 2017, jf. inndelingslova § 26. Fylkestinget vil då også ta stilling til kva mandat og avgjerdsmynde fellesnemnda bør få.

3. Fylkestinget understrekar at det er heilt uakseptabelt å dele noverande Sogn og Fjordane mellom ulike regionar.
4. Fylkestinget legg intensjonsplanen av 15.09.16 til grunn for ein ny vestlandsregion, med følgjande presiseringar:
  - a) Det er ein viktig føresetnad at krava om oppgåver som er fremja i kapittel 10 i intensjonsplanen vert følgde opp frå sentrale styresmakter både når det gjeld eksisterande og nye oppgåver.
  - b) Den framtidige administrasjons- og tenestestrukturen må byggje på desentralisering, maktspreiing og prinsippet om å ta heile regionen i bruk. Tilsette må gjennom ein brukarnær og desentralisert struktur kunne utføre sine oppgåver innanfor alle sentrale fagområde og sektorar, sjølv om dei ikkje arbeider der den administrative leiinga har hovudsete. Ved framtidig rekruttering må dette prinsippet stå sentralt.
  - c) Fylkestinget i Sogn og Fjordane føreset at Vestlandsregionen skal ha nynorsk som administrasjonsspråk. Fylkestinget i Sogn og Fjordane føreset at Vestlandsregionen gjer vedtak om at staten bruker nynorsk til regionen.
  - d) Dersom dei nye folkevalde regionane (nasjonalt) får svært ulike innbyggjartal, må Stortinget kunne fråvike generalistprinsippet for oppgåvedeling mellom staten og regionane.
  - e) Ekspertutvalet som i 2017 skal opprettast i samband med regionreforma, må leggje til rette for at Stortinget kan overføre viktige samfunnsoppgåver frå statleg til regionalt folkevalt nivå. Både rolla som samfunnsutviklar og rolla som leverandør av offentlege tenester og velferdsytingar må styrkast. Fylkeskommunane må vere godt representerte i nemnde utval.
  - f) Fylkesmannsembetet på Vestlandet må få ei organisering og ei regional inndeling som samsvarer med det folkevalde regionale nivået sin geografiske struktur. Fylkesmannsembetet må få ei desentralisert forvaltning lokalisert i dagens fylke, med leing frå Sogn og Fjordane.
  - g) Vi syner elles særleg til premissane i intensjonsplanen sitt kapittel 10, som også er omtala tidlegare i dette vedtaket.

5. Dersom dei andre fylkeskommunane gjennom vedtak på fylkestinga i desember 2016, ikkje går inn for etablering av ein vestlandsregion, går fylkestinget inn for at det oppnemnde forhandlingsutvalet for regionreforma får fullmakt til å starte og gjennomføre ny dialog og forhandlingar om alternativ ny regionløysing: Samanslåing av fylkeskommunane Sogn og Fjordane og Hordaland, der det også vert opna opp for å invitere Møre og Romsdal inn i forhandlingar om ei slik løysing.

Slike eventuelle forhandlingar føreset at Møre og Romsdal, innan utgangen av 2016, stadfestar at dei vil vere med å forhandle om ein intensjonsplan med ein struktur og eit detaljeringsnivå tilsvarande planen av 15.09.16. Møre og Romsdal må òg akseptere ei framdrift som gjev grunnlag for nye fylkestingsvedtak innan utgangen av januar 2017. Dette føreset at også Hordaland aksepterer ein slik invitasjon.

Dette føreset også at ein på statleg side aksepterer at vi får høve til å gjere nye fylkestingsvedtak innan utgangen av januar 2017.

I dette tilfelle gjeld pkt. 2, 2. og 3. avsnitt, og pkt. 4 tilsvarande, men då tilpassa dei fylkeskommunar som vert med på ei slik subsidiær løysing.

Fylkestinget vil nemne opp sine representantar til fellesnemnda i april 2017 jf. inndelingslova § 26. Fylkestinget vil då også ta stilling til kva mandat og avgjerdsmynde fellesnemnda bør få.

## VEDLEGG 2

### **Fylkestinget i Hordaland gjorde 14.12.16 slikt vedtak i FT-sak 121/16:**

1. Fylkestinget viser til inngått intensjonsavtale for etablering av Vestlandsregionen og går inn for at Hordaland fylkeskommune, Rogaland fylkeskommune og Sogn og Fjordane fylkeskommune går saman i ein ny folkevald region på Vestlandet. Det er ein viktig føresetnad at krava om oppgåver som er fremja i kapittel 10 i Intensjonsplanen vert følgt opp frå sentrale styresmakter både når det gjeld eksisterande og nye oppgåver. Fylkestinget søker med grunnlag i inndelingslova om slik samanslåing.
2. Fylkestinget vil understreke at folketal og geografisk utstrekning ikkje må vere til hinder for etablering av Vestlandsregionen i ein ny regionstruktur, og at generalistprinsippet for oppgåvedeling mellom statlege og regionale ansvarsområder må kunne fråvikast i ein regionstruktur med svært ulikt innbyggjartal i dei nye regionane. Fylkestinget ber om at oppgåvedifferensiering vert lagt inn i mandatet til ekspertutvalet som skal vurdere overføring av nye statlege oppgåver til regionalt folkevald nivå.
3. Fylkestinget går inn for at nynorsk vert administrasjonsspråket i den nye Vestlandsregionen.
4. Fylkestinget i Hordaland ønskjer primært ein Vestlandsregion som består av Hordaland, Rogaland og Sogn og Fjordane. Fylkestinget i Rogaland har sagt nei til ei slik løysing. På denne bakgrunn gjev fylkestinget i Hordaland det oppnemnde forhandlingsutvalet for regionreforma fullmakt til å starta opp ny dialog og gjennomføre nye forhandlingar om ein intensjonsavtale for samanslåing av fylkeskommunane Sogn og Fjordane og Hordaland. Fylkestinget i Hordaland er positiv til at einskilde kommunar i Nord- Rogaland som ønskjer å bli ein del av den nye Vestlandsregionen søker om det.